

固安文獻志

朱益藩署檢

固安文獻志卷五目錄

耆舊事彙

梁

張簡憲纘

張僕射綰

張衡尉第四子

隋

沙門靖嵩

固安文獻志卷六目錄

耆舊事彙

唐

張漢陽王柬之

張著作湑

張漢陽王次子

固安文獻志卷五

天津徐世昌鑒定

縣人賈廷琳謹編

耆舊事彙

梁

張簡憲續

下

張簡憲遺著

今存賦六首
墓誌銘二首

表二首
哀策文三首
書啟三首
詩四首

南征賦

歲次姬訾。月惟中呂。余謁帝於承明。將述職於南楚。忽中川而
返顧。懷舊鄉而延佇。路漫漫以無端。情容容而莫與。乃弭節歎
曰。人之寓於宇宙也。何異夫栖蟬之爭戰。附螭之游禽。而盈虛

倚伏俯仰浮沈矜榮華於尺景。總萬慮於寸陰。彼忘機於粹日。乃聖達之明箴。妙品物於貞觀。曾何足而繫心。撫余躬之末迹。屬興王之盛世。蒙三纓之休寵。荷通家之渥惠。登石渠之三閣。典校

武英殿
本作敦

文乎六藝。振長纓於承華。眷儲皇之上歡。居銜觴而

接席。出方舟以同濟。彼華坊與禁苑。常宵盤而晝憇。思德音其在耳。若清塵之未逝。經二紀以及茲。悲明離之永翳。惟平生之編能。實有志於棲息。慙滅沒之千里。謝韓哀於八極。如蓑裘之代用。譬輪轅之曲直。愧周任之清規。諒無取於陳力。逢濯纓之嘉運。遇井汲之明時。懷君恩而未答。顧靈瑣而依遲。總端揆以居副。長庶僚而稱師。猶深泉之短綆。若高墉而無基。伊吾人之

罪薄。豈斯滿之能持。奉皇命以奏舉。方驅傳於衡疑。遵夕宿以
言邁。戒晨裝而永辭。行搖搖於南逝。心眷眷而西悲。爾乃橫濟
牽牛。傍瞻雉庫。前觀隱脈。却視雲布。追晉氏之啟戎。覆中州之
鼎祚。鞠三川於茂草。霑兩京於朝露。故黃旗紫蓋。運在震方。金
陵之兆。允符厥祥。及歸命之銜璧。爰獻璽於武王。啟中興之英
主。宣十世而重光。觀其內招人望。外攘千紀。草創江南。締構基
址。豈徒能布其德。主晉有祀。雲漢作詩。斯干見美而已哉。乃得
正朔相承。於茲四代。多歷年所。二百餘載。割疆場於華戎。拯生
靈於宇內。不被髮而左衽。繫明德其是賚。次臨滄之層巘。尋叔
寶之舊堦。蘊珠玉之餘潤。昭羅綺之遺妍。懷若人之遠理。豈喜

愠其能遷。雖魂埋於百世。猶映澈於九泉。經法王之梵宇。觀因
時之或躍。從四海之宅心。故取亂而誅虐。在蒼精之將季。翦洪
柯以銷落。既觀蜎而逞刑。又施獸而爲譴。候高燹以巧笑。俟長
星而懽噓。何慄慄之黔首。思假命其無託。信人欲而天從。爰物
觀而聖作。我皇帝應籙受圖。聰明神武。樂豐而運。席卷三楚。師
克在和。仁義必取。形猶積決。應若鸞舉。於是殪桑林之封豨。繳
青丘之大風。戢干戈以耀德。肆時夏而成功。放流聲於鄭衛。屏
豔質於傾宮。配軒皇以邁迹。豈商周之比隆。化致升平。于茲四
紀。六夷膜拜。八蠻同軌。教穆於上庠。冤申於大理。顯三光之照
燭。降五靈之休祉。諒殊功於百王。固無得而稱矣。泝金牛之迅

渚。觀靈山之雄壯。實江南之丘墟。平雲霄而竦狀。標素嶺乎青
壁。葺頽文於翠嶂。跳巨石以驚湍。批衝巖而駭浪。鏹千尋之峭
岸。溔萬流之大壑。隱日月以蔽虧。搏風煙而回薄。崖映川而晃
朗。水騰光而倏爍。積霜霰之往還。鼓波濤之前卻。下流沫以洊
險。上岑崟而將落。聞知命之是虞。故違風而靡託。訊會骸之詭
狀。云怒特之來奔。及漁人之垂餌。沈潛鎖於洪源。鑒幽塗於忠
武。馳四馬之高軒。不語神以徵怪。情存之而勿論。曬姑熟之舊
朔。訪遺迹兮宣武。挾仲謀之雄氣。朝委裘而作輔。歷祖宗之明
君。猶負芒於盛主。勢傾河以覆岱。威回天而震宇。雖明允之篤
誠。在伊稷而未舉。矧有功而無志。豈季葉其能處。懼貽笑於文

景憂象賢之覆餗。雖苞蘖以代興。終夷宗而殄族。彼儋石之贏儲。尙邀之而俟福。况神明之大寶。乃闇干於天祿。造局鍵之候司。發傳書於關尉。據轅轅乎伊洛。守衡津於河渭。無矯且以招賓。闕捐繻而待貴。實祇敬於王典。懷鞠躬而屏氣。惟函谷之襟帶。疑武庫之精兵。採風謠於往昔。聞乳獸武英殿本作虎於甯成。在當今

而簡易。止譏鑒其姦情。陋文仲之廢職。鄙彰門之食征。於是近睇赭岑。遙瞻鵠岸。島嶼蒼茫。風雲蕭散。屬時雨之新晴。觀百川之浩沔。水泓澄以闇夕。山參差而辨旦。忽臨睨於故鄉。眇江天其無畔。遡洄流而右阻。遵長薄而左貫。獨向風以舒情。攀芳洲其誰翫。息銅山而繫纜。訪叔文之靈宇。得舊名而猶存。皆攢蕪

而積楚。想夫君之令問。實有聲於前古。拯巴漢之廢業。爰配名
於鄒魯。辨山精以息訟。對祠星而寤主。每撫事以懷人。非末學
其能覩。嘉梅根之孝女。尙藥肥於媵姬。嗟吳人之重辟。憂峻網
於將貽。彼沈瓜而顯義。指滄波而爲期。此浮履以明節。赴丹燭
其何疑。信理感而情悼。實悽悵於余悲。空沈吟以遐想。愧邯鄲
之妙詞。望南陵以寓目。美牙門之守志。當晉師之席卷。豈藩籬
而不庇。攜老弱於窮城。猶區區乎一簣。雖挈瓶之小善。實君子
之所識。句闕一是謂事人之禮。入雷池之長浦。想恭岱之芳塵。臨
魚官以輟膳。踐寒蒲之抽筠。又有生爲令德。沒爲明神。或捐家
事主。攜手拜親。或正身殉義。哀感市人。所以家稱純孝。國號能

臣揚清徽於上列。竝異世而爲隣。發曉渚而遡風。苦神吳之難
習。岸曜舟而不進。水騰沙以驚急。天噎噎其垂陰。雨霏霏而來
集。愍征夫之勞瘁。每舉帷而佇立。由江沔之派別。望彭滙之通
津。塗未中乎及絳。日已盈於浹旬。於是千流共歸。萬嶺分狀。倒
景懸高。浮天瀉壯。清江洗滌。平湖夷暢。翻光轉采。出沒搖漾。岷
山蟠冢。悠遠寂寥。青溢赤岸。控汐引潮。望歸雲之蓊蓊。揚清風
之飄飄。界飛流於翠薄。耿長虹於青霄。若夫灌莽川涯。層潭水
府。游泳之所往還。喧鳴之所攢聚。羣飛沙漲。掩薄草渚。奇甲異
鱗。雕文絳羽。聽寡鶴之偏鳴。聞孤鴻之慕侶。在客行而多思。獨
傷魂而懷楚。美中流之衝要。因習坎以守固。旣因之而設險。又

唐之而務德。南通珠崖夜郎。西款玉津華墨。莫不內清姦宄。外
弭苛慝。籬屏京師。事有均於齊德也。眄匡嶺以躊躇。想霞裳於
雲仞。流姁娥之逸響。發王子之清韻。若夜光而可投。豈榮華之
難擯。美還丹其何術。佇一丸於來信。徑遵途乎鄂渚。迹孫氏之
霸基。陳利兵而蓄粟。抗十萬武英殿本作倍之銳師。在賢才之必用。寧推

誠而忍欺。圖富強以法立。屬貞臣而日嬉。識徐基於江畔。云釣
臺之舊址。方戰國之多虞。猶從容而宴喜。欽輔吳之忠諫。歎仲
謀之虛己。處君臣而竝得。良致霸其有以。伊文侯之雅望。誠一
代之偉人。彌觀書以心服。玉比德而譽均。遭時雄之應運。方協
義以經綸。名旣逼而愈賞。言雖聞而彌親。惜勤王於延獻。俾漢

京之惟新。何天命其弗與。悲盛業之未申。汎蘆洲以延佇。聞伍員之所濟。出懷珠而免讐。歸投金以答惠。彼無求於萬鍾。唯長歌而鼓枻。慨斯誠之未感。乃沈軀以明誓。空負恨其何追。徒臨飧而先祭。及旋師於鄭國。美邀福於來裔。入郢都而抵掌。壯天險之難窺。允分荆之勝略。成百代之良規。賈生方於指大。應侯譬之木披。所以居宗振末。強木弱枝。聞古今之通制。歷盛衰而不移。可不謂然與。美經國之遠體也。酌忠言於城郢。播終古之芳猷。忘我躬之匪閱。顧社稷而懷憂。服莊王之高義。乃徵名於夏州。恥蹊田之過罰。納申叔之嘉謀。觀巫臣之獻箴。鑒周書以明喻。何自謀其多僻。要桑中而遠赴。若葆申之誅丹。實匡君以

成務在兩臣而優劣居二主其竝裕臨赤崖而慷慨摧雄圖於
魏武。棄戰勝以長驅。志吞吳而并楚。總八州之毅卒。期姑蘇而
振旅。時有便乎建瓴。事無留於蕭斧。霸孫赫其霆奮。仗萬俗之
英輔。裂宇宙而三分。誠決機乎一舉。嗟玄德之矯矯。思興復於
舊京。招臥龍於當世。配管仲而稱英。收散亡之餘弱。結與國而
連橫。延五紀乎岷漢。紹四百於炎精。望巴丘以遭回。遵洞庭而
敞悅。沈輕舟而不繫。何靈胥之浩蕩。眺君楸之雙峰。徒臨風以
增想。償瑤觴而一酌。駕采蛺而獨往。爾乃南奠衡霍。北距沮漳。
包括沅澧。汲引瀟湘。澎湃長邁。漫漫回翔。蕩雲沃日。吐霞含光。
青碧潭嶼。萬頃澄澈。綺蘭從風。素沙被雪。雜雲霞以舒卷。閒河

洲而斷絕。回曉仄於中川。起長飈而半滅。稅遺構之舊浦。瞻汨羅以隕泗。豈懷寶而迷邦。猶殷勤而一致。蘊芳華以襲積。非黨人之所媚。合小雅之怨辭。兼國風之美志。譬彈冠而振衣。猶自別於泥滓。且殺身以成義。寧露才而揚己。悲先生之不辰。逢椒蘭之妒美。有驂騑而不馭。焉遑遑於千里。既踐境以思人。彌流連其無已。脩行潦之薄薦。敢憑誠於沼沚。謁黃陵而展敬。奠瑤席乎川湄。具蘭香以膏沐。懷椒糈而要之。延帝子于三后。降夔龍於九疑。騰河靈之水駕。下太一之靈旗。撫安哥以會儔。疏緩節而依遲。日徘徊以將暮。情眇默而無辭。愠秦皇之川幸。尤土壤以加戮。昧天道之無親。勤望祀以祈福。將人怨而神怒。故飛

川而蕩谷。推冥理以歸讐。遂刊山而赭木。於是下車入部。班條
理務。砥課庸薄。夕惕兢懼。存問長老。隱恤氓庶。奉宣皇恩。寬徭
省賦。遠哉盛乎斯邦之舊也。有虞巡方以託終。夏后開圖而疏
決。太伯讓嗣以來遊。闕臣祈仙而齊潔。固是明王之塵軌。聖賢
之蹤轍也。若夫屈平懷沙之賦。賈子遊湘之篇。史遷摘文以投
弔。揚雄反騷而沈川。其風謠雅什。又是詞人之所流連也。亦有
仲寧咸德。仍世相繼。父子三台。緇衣改敝。古初抱於烈火。劉先
高而忤世。蔣公琰之弘通。桓伯緒之匡濟。鄧兗時之絕述。谷思
恭之藻麗。實川嶽之精靈。常間出而無替也。至於殊庭之客。帝
鄉之賢。神奔鬼化。吐吸雲煙。玉笥登之而卻老。金人植杖以尊

泉。蘇生騎龍而出入。處靜駕鹿以周旋。配北燭之神女。偶南榮之偃佺。時髣髴其遙見。亦往往而有焉。爾乃歷省府庭。周行街術。山川遠覽。邑居近悉。割黔中以置守。獻青陽而背質。鄒生所謂還舟。楚王於焉乘駟。巡高山之累仞。褒吳文之爲宰。彼非劉而八王。皆國士而身醢。在長沙而著令。經五葉其未改。知天道之福謙。勝一時之經始。尋太傅之故宅。今築室以安禪。邑無改於舊井。尙開流而洌。武英殿本作列泉。懷伊管之政術。遇庸臣而見遷。終被知於時主。嗟漢宗之得賢。受齊君之遠託。豈理謝而生全。哀懷王之不秀。遂抱恨而傷年。脩定祀于北郭。對林野而幽謁。庶無吐於馨香。祀瓊茅而沃醑。景十三以啟國。惟君王其能大。迨